

欽定續文獻通考



欽定續文獻通考卷十八

征權考

臣等謹按馬端臨作征權考自征商關市以暨雜征斂等門阜財足用之道固已詳言之矣顧征權之法行之自古積久不能無弊宋初立法務從簡便南渡以降諸郡稅額亦累有放免然而貪吏並緣苛取百出私立稅場算及緡錢虛市有稅空舟有稅甚至以食米爲酒米以衣服爲布帛皆使納稅蠹國剝民有不可勝言者遼置鹽鐵轉運度支錢帛諸司金有鹽筴酒麴茶稅征商權場等法元雖取民無定而其要一本於寬故前代告緡借商經總之制元皆無之明制府州縣有稅庫司局河泊有所諸歲辦商稅漁課引絲契本有額至神宗之季遂議開礦權稅於是所在搜括日增歲溢上取一下取二官取一羣姦人取二利則歸下怨則歸上所謂利之所在害卽隨之者也續考斷自南宋寧宗迄於明代其門類仍倣馬氏之例而以見於史志紀傳各書者依次編緝亦可藉以考其原委而鏡其得失焉

征商 關市

宋寧宗開禧元年六月罷廣東稅場八十一墟 初關市之征高宗時屢經省罷其未盡者孝宗繼志悉推行之 淳熙五年六月罷諸州私置稅場時知臨安府吳淵乞復置西溪寺兩處發引攔稅帝曰關市譏而不征去城五千里之外豈可復置攔稅耶十二年給舍看詳趙汝誼乞行下省臣遇客販米不得阻遏其免收力勝錢一項自有見行約束如有違戾以喝花爲名故作留滯者許客人赴訴監司堂省重寘憲典從之光宗紹熙三年三月罷雅州稅場五至寧宗時諸郡商稅屢與放免焉

理宗紹定五年三月詔京城內外免征商三月

淳祐四年九月臺臣言嚴州及紹興蕭山等縣征商煩苛詔亟罷之

寶祐二年六月罷臨安府臨平鎮稅場 祕書少監劉克莊進故事曰自漢中葉筦權之法行上而公卿下而賢良文學各持一論然公卿之論常勝雖合賈誼董仲舒諸名儒唇敝舌腐而不能殺其勢惟本朝則不然所用三司使如寇準蔡齊王堯臣包拯宋祁張方平蔡襄其人平日既持賢良文學之論一旦居公卿之位終不肯背儒者大旨此所以異於漢也熙寧改法初猶用程顥蘇轍爲官屬其後薛向吳居厚之徒始進於是司馬光得政內擢李常爲版書外擢鮮于侁爲漕臣以救其弊元祐相業第一義也臣謂國家此一氣脈宜延續不宜間斷宜培養不宜杯伐顧今天下兵不可汰官不可省郊廟之禮不可闕掖廷之用不可減臣非敢立高虛之論直以理財爲非也昔之理財者摧抑富商巨賈之盜利權者耳逐什一以養口體者弗問也削弱豪家大姓之侵細民者耳營升斗以育妻子者弗問也天地所產海之魚鹽藪之薪蒸漆枲絺紵之百貨械器陶冶之一藝蓋販夫販婦園夫紅女所資以爲命者苟操幹之無遺則歎愁之寧免漢算緡錢下逮宋作唐爲官市害及樵夫治世氣象不宜如此向也權酷權契信有遺利今囊括殆盡弓張末弛已失利源邑困繭絲之取民受池魚之殃議者排之愈力執事者持之愈堅踵漢廷鹽鐵之弊失先朝前輩名儒治賦之意麟趾澤息鼉尾謗興將安取此臣觀今日事勢損上未易言也酌中制以取之足矣裕民未易言也捐末利以還之足矣昔陳恕令三司吏各條茶法第爲三等曰上者取利太深可行之商賈不可行於朝廷吾用其中者真計臣之心也王旦遣漕臣曰朝廷權利至矣真大臣之言也惟詔廟堂省府亟圖之

度宗咸道元年正月詔臨安免征商三月 四年再免在京征商三月

恭帝德祐元年二月令長吏一切勿征稅

遼太祖三年五月置羊城於炭山北起榷務以通諸道市易

聖宗統和元年九月南京秋霖害稼權停關征以通山西糴易 從南京留守奏也

臣等謹按遼史食貨志又載乾亨間留守司言民艱食請弛居庸關稅疑卽紀統和元年九月事蓋統和改元卽在乾亨五年六月故志猶誤仍乾亨年號也

四年十一月以古北松亭榆關征稅不法致阻商旅遣使鞠之

十二年二月免諸部歲輸羊及關征

十九年閏十一月減關市稅

開泰元年十二月貴德龍化儀坤雙遼同祖七州始征商 初東遼之地自神冊來附未有權酤鹽麴之法關市之征亦甚寬弛馮延休韓紹勳相繼以燕地平山之法繩之民不堪命至太平九年八月東京舍利軍詳穩大延琳等遂乘之以作亂

金世宗大定二年制院務剝削及功酬格

八月罷諸關征稅止令議察 時張中彥爲吏部尙書上疏曰古者關市譏而不征今使掌關市者征而不譏苛留行旅至剔拔囊筭甚於剽掠有傷國體乞禁止之從之

二十年正月定商稅法金銀百分取一諸物百分取三 至章宗泰和四年言事者以物價視舊爲高除金銀則

額所不能盡該自餘金銀可並添一分詔從之七年三月戶部尚書高汝礪言舊制小商貿易諸物收錢四分而金銀乃重細之物多出富有之家復止三分是爲不備亦乞一例收之省城議以爲如此恐多隱匿遂止從舊章宗明昌元年正月敕尚書省定院務課商稅額 諸路使司院務千六百一十六處比舊減九十四萬一千餘貫遂罷坊場免賃房稅

八月禁止託親王公主奴隸占綱船侵商旅

十月罷提點所賞罰制 尚書省奏今天下使司院務既減課額而監官增虧復有升遷追殿之制宜罷提點所給賞罰俸之制但委提刑司察提點官侵犯場務者則論如制詔從之

五年增置中都等路院務 陳言者乞復舊制坊場不許惟許增置院務詔尚書省參酌定制遂擬遼東北京依舊許人分辦中都等十一路差官按視量添設院務於二十三處自今歲九月一日立界制可大定間中都稅使司歲獲十六萬四千四百四十餘貫自增院務後歲獲二十一萬四千五百七十九貫凡增五萬貫有奇

泰和六年五月制院務課虧令運司差官監權

元太宗二年正月定諸路課稅

十一月置十路徵收課稅使 以陳時可趙昉使燕京劉中劉桓使宣德周立和士貞使西京呂振劉子振使太原楊簡高廷英使平陽王晉賈從眞定張瑜王銳使東平王德亨侯顯使北京夾谷永程泰使平州田木西李天翼使濟南 元史耶律楚材傳曰太宗初卽位楚材條上便宜一十八事其一貿易借貸官物者罪之近臣博第言漢人無補於國可悉空其人以爲牧地楚材曰陛下將南伐軍需宜有所資誠均定中原地稅商稅鹽酒鐵

治山澤之利歲可得銀五十萬兩帛八萬疋粟四十餘萬石足以供給何謂無補哉乃奏立燕京等十路徵收課稅使凡長貳悉用士人如陳時可趙昉等皆寬厚長者極天下之選參佐皆用省部舊人

六年立徵收課稅所 凡倉庫院務官并合千人等命各處官司選有產有行之人充之其所辦課程每月赴所輸納有貿易借貸者並徒二年杖七十所官擾民取財者罪亦如之

十一年十二月商人烏爾圖哈瑪爾蠻撲買中原銀課二萬二千錠以四萬四千錠爲額從之 至次年正月卽

以烏爾圖哈瑪爾充提領諸路課稅所官 耶律楚材傳曰富人劉忽篤馬涉獵發丁劉廷玉等以銀一百四十萬兩撲買天下課稅楚材曰此貪利之徒罔上虐下爲害甚大奏罷之自庚寅定課稅格至甲午平河南歲有增羨至戊戌課銀增至一百一十萬兩譯史安天合者諂事鎮海首引烏爾圖哈瑪爾撲買課稅又增至二百二十萬兩楚材極力辯諫至聲色俱厲言與涕俱帝曰爾欲搏鬪耶又曰爾欲爲百姓哭耶姑令試行之楚材力不能止乃歎息曰民之困窮將自此始矣 又楊奐傳曰歲戊戌試諸道進士奐試東平兩中賦論第一北上謁中書耶律楚材楚材薦之授河南路徵收課稅所長官兼廉訪使將行言於楚材曰僕不敏誤蒙不次之用以書生而理財賦已非所長又況河南兵荒之後遺民無幾烹鮮之喻正在今日急而擾之糜爛必矣願假以歲月使得撫摩瘡痍以爲朝廷愛養基本萬一之助楚材甚善之旣至招致一時名士與之議政事約束一以簡易爲事按行境內親問監務月課幾何難易若何有以增額言者奐責之曰剝下欺上爾欲我爲之耶卽減元額四之一公私便之不踰月政成時論翕然以爲前此漕司未之有也

世祖中統四年正月改諸路監權課稅所爲轉運司 至至元六年二月罷宣德府稅課所以上都轉運司兼領

改河南懷孟順德三路稅課所爲轉運司十七年六月中書左丞阿答海等請罷江南所立稅課提舉司平章政事阿合瑪特力爭詔御史臺選官檢察其實以聞十九年二月改上都宣課提領爲宣課提舉司二十六年正月罷甘州宣課提舉司入寧夏都轉運使司

是年令凡在京權勢之家爲商賈及以官銀買賣之人並赴務輸稅入城不引者同匿稅法用都轉運司阿哈瑪特等言也至元十九年十一月以勢家爲商賈者阻遏舟船立沿河巡察軍犯者沒其家仁宗元祐五年二月敕上都諸寺權豪商販貨物並輸稅課

臣等謹按元典章中統二年六月恢辦課程條畫十二事內一條諸犯匿稅者貨物一半沒官一半付告人充賞但犯笞五十入門不引者同匿稅科斷食貨志謂是年用阿哈瑪特等言始定是制與典章年月不同

至元四年九月申嚴西夏中興等路僧尼道士商稅酒醋之禁至十二年二月遣必闕赤孛羅檢察西夏權課

七年五月定三十分取一之制以銀四萬五十錠爲額有溢額者別作增餘尙書省言諸路課程歲銀五萬錠

恐疲民力宜減十分之一運司官吏俸祿宜與民官同其院務量給工食仍禁所司多取於民歲終較其增損而

加黜陟從之至二十年詔各路課程差廉幹官二員提點增羨者遷賞虧兌者賠償降黜凡隨路所辦每月以其

數申部違期不申及雖申不圓者其首領官初犯罰俸再犯決一十七令史加一等三犯正官取招呈省其院務

官俸鈔於增餘錢內給之其課仍依舊例三十分取一院務官大者不過三員攢攔合千人等驗課存設運司并

提點官吏於管下院務取借錢物者以盜論與者同罪卽應稅之物不經依例抽分使訖稅印者亦如之

免上都商課惟收市易莊宅等契本費尙書省言上都地畝遙遠商旅往來不易宜特免收稅以優之惟市易

莊宅奴婢孳畜例收契本工墨之費從之至二十年七月敕上都商稅六十分取三十二分五月又減上都稅課於一百兩之中取七錢半

十年四月免隆興路權稅三年

十四年七月權大都商稅至十九年二月減大都稅課官十四員爲十員二十年九月徙舊城市肆局院稅務皆入大都減稅徵四十分之一

二十年十一月鞏昌設拘權課稅所諸王只必特穆爾請於分地二十四城自設管課官不從又請立拘權課稅所其長從都省所定次則王府差設從之至二十三年正月罷鞏昌二十四城拘權所以其事屬有司禁雲南管課官於常額外多取餘錢

二十一年七月定稅物不得抽分本色行御史臺言應稅貨物並官扣算寶鈔不得抽分本色違者以偷盜官物論取與同罪命中書省下部行之

二十二年六月詔減商稅罷牙行

二十六年大增天下商稅增腹裏爲二十萬錠江南爲二十五萬錠從丞相僧格請也

二十七年八月禁諸人毋沮平陽太原大同宣課至二十八年二月又詔毋沮擾山東轉運使司課程

二十九年定諸路輸納之限不過四孟月十五日

三十年五月敕僧寺邸店商賈舍止其物貨依例收稅

三十一年詔天下商稅有增餘者毋作額

成宗元貞元年增上都稅 用平章刺真言也至大德元年十月又減大都商稅歲額爲三千錠

大德二年十二月定諸稅錢二十取一歲額之上勿增 至七年二月帝謂中書省臣曰比有以歲課增羨希求爵賞者此非培植於民何從而出自今除元額外勿以增羨作正數十月安西轉運司於常課外增算五萬七千四百錠人賜衣一襲以勸其功

三年三月罷陝西路拘權稅課所

七年二月減杭州稅課提舉司冗員

九年七月蠲晉寧今年商稅之半 以累歲被災故也

武宗至大三年正月禁近侍諸人外增課額及進他物有妨往制

定稅課殿最法 諸色課程並係大德十一年較定舊額元增總爲正額折至元鈔作數自至大三年爲始恢辦餘止以十分爲率增及三分以上爲下酬五分以上爲中酬七分以上爲上酬增及九分爲最不及三分爲殿所設資品官員以二周歲爲滿定稅課官等第萬錠之上設正提舉同提舉副提舉各一員千錠以上設提領大使副使各二員五百錠之上設提領大使副使各一員百錠之上設大使副使各一員

四年十一月已時仁宗即位敕商稅官盜稅課者同職官贓罪

仁宗延祐七年十一月禁京城諸寺邸舍匿商稅 至泰定帝泰定元年四月稅僧道邸舍積貨致和元年正月禁僧道匿商稅文宗至順二年八月命宣課提舉司毋收燕特穆爾邸舍商貨

文宗天歷二年三月僧道也里可溫尤忽答失蠻爲商者仍舊制納稅 至七月遂征京師僧道商稅至順二年

三月中書言宣課提舉司嚴權商稅爲鈔十萬餘錠比歲數不登乞凡僧道爲商者仍征其稅命誠爲僧者仍免之

十月以親祀太廟禮成詔免奉元路民間商稅一年 至至順三年六月又免陝西行省本年商稅

天曆時天下總入商稅額數

大都宣課提舉司一十萬三千六錠一十一兩四錢大都路八千二百四十二錠

九兩七錢上都留守司一千九百三十四錠五兩上都稅課提舉司一萬五百二十五錠五兩興和路七百七十錠一十七兩一錢永平路二千二百七十二錠四兩五錢保定路六千五百七錠二十三兩五錢嘉定路一萬七千四百八錠三兩九錢順德路二千五百七錠九兩九錢廣平路五千三百七錠二十兩二錢彰德路四千八百五錠四十二兩八錢大名路一萬七千九十五錠八兩五錢懷慶路四千九百四十九錠二兩衛輝路三千六百六十三錠七兩河間路一萬四百六十六錠四十七兩二錢東平路七千一百四十一錠四十八兩四錢東昌路四千八百七十九錠三十二兩濟寧路一萬二千四百三錠四兩一錢曹州六千一百一十七錠四十六兩三錢濮州二千六百七十一錠七錢高唐州四千二百五十九錠六兩泰安州二千一十三錠二十五兩四錢冠州七百三十八錠一十九兩七錢寧海州九百四十四錠三錢德州二千九百一十九錠四十二兩八錢益都路九千四百七十七錠一十五兩濟南路一萬二千七百五十二錠三十六兩六錢般陽路三千四百八十六錠九兩大同路八千五百三十八錠一十九兩一錢冀寧路一萬七百一十四錠三十四兩六錢晉寧路二萬一千三百五十九錠四十兩二錢嶺北行省四百四十八錠四十五兩六錢遼陽行省八千二百七十三錠四十一兩四錢河南行省一十四萬七千四百一十八錠三十二兩二錢陝西行省四萬五千五百七十九錠三十九兩三錢四川行省



併十之七又有門攤課鈔領於有司

臣等謹按是時征稅雖設而帝每戒多取免苛征如實錄所載洪武七年四月彰德稅課司稅及蔬果飲食畜牧諸物事聞帝曰古稱聚斂之臣甚於盜臣正此等官吏也命罪之八年三月南雄商人以貨入京至長淮關吏留稅之既聞月而貨不售訟於官帝聞之曰商人遠涉江湖各有所向執而留之非人情矣且納課於官彼此一耳遲留月日而使貨不售吏之罪也令予杖而追其俸以償商人九年六月山西平遙縣主簿成樂秩滿來朝上其考曰能恢辦商課帝曰稅有定額若以恢辦爲能是剝削下民失吏職也州考非是命吏部移文以訊十三年六月諭戶部曰曩者奸臣聚斂稅及織悉朕甚恥焉時胡惟庸伏誅自今軍民嫁娶喪祭之物車舟絲帛之類皆勿稅其榜示天下使共周知十九年十一月大同知府鄭彥康奏往歲大同中納鹽糧交易者多所以商稅日增自停中鹽後稅課虧耗不及舊額帝命戶部覈其所虧之數悉免征皆開國之善政也

十年三月遣中官國子生等覈實天下稅課司局 戶部奏天下稅課司局征商不如額者一百七十八處因遣中官國子生及部委官各一人覈實立爲定課

十三年正月命稅課司局額米不及五百石者領其稅於有司 吏部言天下稅課司局歲收額米不及五百者凡三百六十四處宜罷之從府州縣征其課爲便報可

十九年三月詔天下歲解稅課錢鈔其道里險遠難致者許易金銀以進 每金一兩價鈔六錠銀一兩價鈔一錠至宣宗宣德六年六月温州知府吳文淵言今禁用銀而商稅魚課仍徵銀巡攔網戶辦納甚艱乞仍納鈔從之七年三月令湖廣廣西浙江商稅魚課辦納銀者皆折收鈔每銀一兩納鈔一百貫十年正月英宗卽位詔諸

色課程舊折收金銀者仍照例收鈔

成祖永樂元年免軍民常用雜物等稅 凡軍民家嫁娶喪祭時節禮物染練自織布帛及買已稅之物車船運已貨物并農用器各處小民挑擔蔬菜溪河貨賣雜魚民間家園池塘採用雜果非興販者及竹木蒲草器物并常用雜物銅錫器物日用食物俱免稅

七年遣御史監生於收課處權辦課程

定京城官店場房稅 初南京軍民居室皆官所給比舍無隙地商貨至或止於舟或貯城外駟僮上下其價商人病之太祖乃命於三山諸門外瀕水爲屋名場房以貯商貨其貨物以三十分爲率內除一分官收稅錢再出免牙錢一分房錢一分與看守者收用貨物聽客商自賣其小民鬻販者不入場房投稅至是令京城官店場房照三山門外場房例宣課分司收稅錢一分免牙場房錢二分

十年令巡按御史等官查所辦稅鈔有數倍增收及將瑣碎之物概勒稅者治以罪

二十一年權淮安諸處商稅 山東巡撫陳濟言淮安濟寧東昌臨清德州直沽商販所聚今都北平百貨倍往時宜遣人監權商稅一年以爲定額從之

仁宗洪熙元年正月增市肆門攤課鈔 時欲通鈔法戶部尙書夏原吉等請於市肆各色門攤內量度輕重增納課鈔官取其昏軟者悉燬之帝是其言仍命俟鈔法通卽復舊額毋爲常例

宣宗宣德四年始設鈔關及收鈔官 時以鈔法不通由商居貨不稅與市肆鬻販者阻撓所致乃於京省凡十三府州縣商賈湊集地市鎮店肆門攤稅課增舊凡五倍場房庫房店舍居商貨者驛驢車受僱裝載者悉令

納鈔委御史戶部錦衣衛兵馬司官各一員於城門察收其倚勢隱匿不報者物盡沒官仍罪之舟船受僱裝載者計所載料多寡路遠近納鈔於是有溧縣濟寧徐州淮安揚州南京上新河鈔關量舟大小修廣而差其額謂之船料每船百料納鈔百貫

臣等謹按鈔關之設自是年始自北京至南京沿河設立鈔關七曰溧縣臨清濟寧徐州淮安揚州上新河至正統十一年移溧縣鈔關於河西務景泰元年又於湖廣金沙州江西九江及蘇杭二州設鈔關成化弘治間沿革不一嘉靖四年鳳陽府設正陽鈔關前後凡十有二處皆止稅船料惟臨清杭州兼收貨稅至萬曆時止存河西務臨清淮安揚州蘇州杭州九江共七處此明一代鈔關之大略也凡船料始時估料定稅後以估料難核乃度梁頭廣狹爲率自五尺至三丈六尺有差嘉靖時又命以成尺爲限勿科畸零焉

六月從戶部尙書郭資等條奏定場房等納鈔例至七月御史羅亨信言臣監收在京官員軍民鋪店課及場房園圃等鈔俱不按月納官及有鋪店積貨隱匿不報者又油房磨房輒瓦窰木植場皆未增課請今後課鈔過期不納者令順天府兵馬司催督私匿貨物者取勘各追罰鈔一千貫油房亦如場房例除額鈔外納鈔五百貫牛車納一百貫小車二十貫其在外州郡城市多有豪猾軍民居貨在家一如場房或就船交易俱用金銀請遣官點勘居貨之家每房一間月追鈔五百貫又於各處河岸點開往來舟船載貨物者量地遠近盤貨多少每船百料鈔或二百三百貫俱就本處有司收貯則內外鈔皆可通命戶部采其可行者行之

六年二月蠲臨清等處店舍課鈔先是臨清等處官民家多有店舍依在京例收鈔至是侍郎曹宏言比有司令里老開報場房一時畏懼凡街市人戶俱作停貨店舍月納鈔五百貫而實無貨停蓄民貧無鈔有鬻子女產

業輸官者帝覽奏謂戶部曰前欲鈔通故權令店肆納鈔有司不知恤民其弊如此卽勘實蠲除之又命京城及通州店房稅每間自五百貫減至一百貫五十文至正統十四年十二月減至四十貫景泰二年二月戶部奉命議寬恤條件自宣德年間以鈔法不通取勘民間置賣鋪面及住居房屋作塌房各色納鈔今多燒燬倒壞乞除免鈔貫詔如所議

七年三月減各處稅課額外倍罰之數 詔以先因商賈阻滯鈔法加倍罰納稅課今鈔法頗通除正額外倍罰之數以十分爲率減三分塌房減五分南北二京不在此例俟鈔流通再行定擬至五月思南知府張瑾奏思南稅課司歲辦鈔一萬二千六百餘貫邊地別無出產商賈少至累民賠納近於額外再加五倍夷民貧困雖鬻子女不能辦追責急則逃竄山峒乞仍舊便帝諭戶部曰貴州邊郡其可以中國例之乎此蓋卿等初議之失其悉如舊八年六月又諭戶部所收課除前減免外增加之數以三分爲率悉減一分九年十月以旱饑詔府州縣見收稅課及車船門攤地畝果木一應課鈔除正額外因鈔法加增者以十分爲率俱免四分十年正月英宗卽位詔凡課程門攤俱遵洪武舊額不得藉口鈔法妄增正統三年十月以順天府尹姜濤奏免京城小車納鈔四年六月以水災令塌房及車輛鈔貫悉減半徵收十二年三月御史聞人譏奏請停止鬻蔬載薪小車小船納鈔命戶部議行

英宗正統元年直省稅課司局收鈔不及三萬貫者命領其稅於有司 從侍郎于謙請也十一年令各處稅課照永樂七年收辦其見辦課鈔比舊增多者以見辦之數爲額若辦課一萬五千貫與市鎮買賣處離有司路遠及軍衛相參者復設稅課司局雲南貴州原無權辦之處令所司收辦一年爲額至天順元年又令稅課司局不

及萬貫者領於有司

四年七月取回徐州等處收鈔官 戶部奏鄆縣臨清濟寧徐州淮安揚州每船百料納鈔百貫雖累減免止納四十貫然六處徵收不無重複宜革去徐州濟寧二處取回收鈔官從之十月又罷龍江大勝關等處收鈔官至六年罷上新河收鈔官十二年九月又以杭州知府高安言每船百料止納鈔二十貫

七年正月定在京宣課都稅二司稅鈔則例 初二司收課則例不一姦弊蝟生戶部主事汪澍以爲言事下順天府議定每季緞鋪納鈔一百二十貫油磨糖機粉茶食木植翦裁繡作等鋪三十六貫餘悉量貨物取息及工藝受直多寡取稅

八年七月免南京各城門所收稅 南京守備太監劉寧奏先是各城門徵收軍民人等驛馱柴米諸物出入者鈔貫今鈔法通行宜盡免從之

九年置官房於彰義門收商稅課鈔

十一年復差主事一員監收臨清淮安船料鈔

十二年令戶部遣主事二員權辦淮安臨清商稅課鈔順天府委官一員權辦張家灣宣課司商稅俱一年更代景帝景泰元年遣主事二員監收金沙洲九江船料鈔一年更代又遣主事二員監收蘇杭二州船料鈔又遣南京戶部主事一員監收上新河船料鈔又取回河西務臨清淮揚蘇杭及九江金沙洲監收船鈔主事令各府委佐貳官一員每歲輪收各處巡河或巡接御史提督兼理憲宗成化二年遣主事二員監收九江金沙洲錢鈔定爲則例俟一年滿日各府委佐貳一員照例輪收七年復各遣主事一員於蘇杭九江河西務收鈔孝宗弘治十

四年收回臨清收鈔主事令委府州佐貳管理仍令管倉主事監督

十四年九月

時景帝已即位

詔內外門攤商稅課先因鈔法增額者止依洪武舊額收受 次年各商稅課仍依正統時

見行事例收辦時于謙柄國船料鈔每百料減至十五貫又減張家灣及遼陽課稅之半

景帝景泰二年定收稅則例依時估價直 凡商客紗羅綾錦絹布及皮貨磁器草席雨繖鮮果野味等一切貨物依時估價直收稅鈔牙錢鈔場房鈔若干貫及文各有差估計未盡者照相等則例收納其進場房鈔并抽分布疋按月房鈔俱爲除免

五年七月以鈔法阻滯仍比宣德年例令兩京場房店舍菜果園井各色大小鋪行俱減輕納鈔有差 從戶部請也八月給事中陳嘉猷等奏比聞戶部將兩京場房店舍菜園果株及街市各鋪定爲則例按月輸鈔軍民人等俱畏納鈔艱難有將鋪面關閉不敢買賣者有將園圃瓜蔬拔棄而平爲空地者有將果樹斫伐而減少株數者蓋由鋪面已納門攤鈔費園圃亦有夏稅差徭況其間或借資本以貿易或賃房舍以開張或計利多寡而開閉之不常或天時水旱而栽種之弗遂今若通行編冊按月輸鈔民實不堪況邇年來旱澇災傷幾徧天下惟望上鑒天變下憫民窮將各色應納鈔費暫且停止敕部曉諭軍民人等務令鈔與錢兼行則國用不虧下民不擾誠爲兩便帝命既納門攤課鈔其菜果園及小鋪行暫免

英宗天順元年四月命臨清船料鈔改收米以備賑每鈔二貫折米一升 至四年二月巡撫湖廣都御史白圭請將金沙洲見收船鈔改收米賑饑部議每鈔五貫折米三升從之

憲宗成化六年六月以淮揚二府去年亢旱改船料鈔收米每鈔五貫折收粳粟米三升貯於近倉以備賑